


MOSTRE DAL CINE: FILMS PAR DUTIS LIS LENGHIS

La setemane stade si è davuelte a Udin le tierce edizion de Mostre dal Cine, une iniziative promovude dal Centro Espressioni Cinematografiche cul supuart de ARLeF, de Provincie e dal Comun di Udin. Par trê dis la citât e je diventade la capitâl dal cine tes lenghis minoritariis europeanis.



A son stâts presentâts fintremai 19 films che a rivavin di paîs diviers, indula che si fevelin lenghis "piçulis". Sentâts tes comudis poltronis dal cine Visionario, si à podût fâ un viaç dal Friûl ae Siberie (te region di Yamalo Nenets) passant par Sardegna, Ocitanie, Catalogne, Paîs Basc, Bretagne, Frisie e Gales. Lis cognossêso dutis chestis regions? Savêso cjatâlis su la cjartute? Savêso ce lenghis che a fevelin chei che a vivin ali? Se o vês rispindût di no a cualchidune di chestis domandis alore comodatsi in poltrone. In graciis dal cine o podin scuvierzi puecj gnûfs e lenghis diferentis... e je la magjie de "setime art"!



Ancje par furlan o vin une buine produzion cinematografiche: a son i dissens animâts tant che "La Pimpa" e i "Omenuts", lis seriis dutis di ridi come "Felici ma furlans", i films di pôre tant che "Lidris cuadrade di trê", i documentaris di musiche come "JNK - Oltri la ultime frontiere"...

La sielte e je grande, o scometin che grancj e piçui a cjataran dal sigûr alc che ur plâs. La Mostre dal Cine no je la uniche, in diviers paîs europeans si davuelzin manifestazions come cheste che a dan vôs aes lenghis diviersis: la Mòstra de Cinéma Occitan in Catalogne, l'European Minority Film Festival in Frisie... Il prossim apontament al è il Babel Film Festival che si davuelç a Casteddu (Cagliari par Sart) la setemane che e ven... Volêso plui informazions?

Ve chi cualchi link:

www.mostredalcine.org
www.minority-film.net
www.babelfilmfestival.com



Rispuint come Proust



Non
Marta

Etât

8

Dulà sêstu a stâ

a Glemone

Ce ti plasial de tô citât/dal to paîs

il cistiel

Ce no ti plasial de tô citât/dal to paîs

la rive sù

Miôr ami o amie

Elisa

Il to difet

i son tabaiole

Il difet dai tiei gjenitôrs

cuant che a vosin

La ultime volte che tu âs vaiût

chê altre setemane

Lis vacancis plui divertentis

in Cravatie

Il colôr che ti plâs di plui

il celest

Il nemâl che ti plâs di plui

la tigre

Ce robe ti avilissie

Cuant che i lassi un biel puest

Ce no ti plasial fâ i compits

Ce ti fasial pôre

lis âfs

Ce volaessistu fâ di grande/grant

la maestre di asilo

Il libri o film che ti à plasût di plui

Barbie e lis 3 moschetjers

I nons che ti plasin di plui

Serene e Giorgie

Robe di bevi preferide

coca cola

Robe di mangjâ che ti plâs di plui

Pomodoros e cadumers

Personac preferit/preferide

le WINX

Il to pipinot

Gim: un arsut

Par partecipâ ae rubriche lis domandis a van discjamadis dal sit www.arlef.it, compiladis a man e inviadis insiem cuntune foto e la liberatorie firmade dai gjenitôrs a: arlef@regione.fvg.it
I fruts che a parteciparan a podaran ritirà in ARLeF une copie dal dvd cui cartons de "La Pimpa par furlan"



LA FILASTROCJE

RE e REGJINE



A jerin une volte un re e une regjine a vevin di fâ la polente e no vevin farine.

A jerin une volte une regjine e un re e vevin di fâ il pan e no vevin cun ce.

UNE RIDUÇADE...



La mè femine e à iscrit il frut a judo e la frute a karate: il risultât al è che cuant che ur ai cridât parcè che no vevin fat i compits, il frut mi tignive e la frute mi pacave.

CE ISAL?

Ce len isal chel, frutine, che al à cuatri voltis trê i ramaçs cun cuatri pomis? Svelte il cont e po induvine.



AHHH! LA RISPUESTE DAL NUMAR STÂT

Il cîl, la stee, il soreli



PIRON e SEDON



La torte di cjastinis e la cjase e Profume di Autun.

ce che al covente:

- 500 gr di cjastinis di lessâ
- 200 gr di zucar
- 100 gr di spongje
- 100 gr di mandulis
- masanadis
- 3 ûfs
- 1 limon
- levan



Ogni stagjon e à la sò pome e chest al è il moment des **cjastinis**! Se tu sês lât a fâ une cjaminade tal bosc, magari bande des Vals dal Nadison e tu lis âs cjapadis sù, alore fasin une torte morbide e energjetiche, perfete pe gulizion. 😊

Prin di dut prepare lis **cjastinis** e tailis cuntun curtissut: fasiti judâ di un grant che la prime part de ricete e je un tic complicade. Lessilis te aghe cjalde un pôc salade e cuntune fuee di orâr (ancje secje): dopre le atomiche che tu stâs cetant di mancûl. In 15' a son cuetis e prontis par jessi speladis lavôr lunc e un tic stufadiç, ancje parcè

che lis cjastinis a scotin, ma il risultât al merete scometino? E poi ogni tant, ancje in cusine si à di fâ un pocje di fature. Fruce lis **cjastinis** ancjemò cjaldis e fasilis diventâ come il puré. Cjale ce bieî sarpiutts che a jessin dal passeverduris!



E cumò comencin cu la part plui facile. Divî i **ûfs**. Sbat i blancs cuntune piçade di sâl a nêf ben ferme e metju in bande. Monte i ros cul **zucar** fin a fâju diventâ blancs, plens di bufulis e sglonfs. Zonte la **spongje** mole a tocûts, la scusse gratade dal **limon**, la **farine di mandulis** e il puré di **cjastinis**. Par ultime la buste di **levan**.

Messedant cuntune sedon di sot in sù, zonte pôcs par volte i blancs di ûf. Messede plan par no smontâ l'impast che al sarà une vore morbit. Ribaltilu intune tortiere taronde passade cu la spongje e pocje farine e metilu in for a 180° par uns 40'. Par capî se al è cuet forilu cuntun stchedincj: se cuant che tu lu tiris fûr al è sut e net, la torte e je cuete.

La torte e ven alte e e reste cetant tenere: mangjândi dome une fete al sarà dificil!

La torte e ven alte e e reste cetant tenere: mangjândi dome une fete al sarà dificil!



CRIBIRIBIN e je la pagine di plante fûr in lenghe furlane che e fasarâ compagne ai letôrs plui zovins fintremai ae fin dal an scolastic. E je un **projet de ARLeF, Agenzie regionâl pe lenghe furlane**, par stiçâ ae leture e ae scritture in lenghe furlane. La redazion e sarà a vuestre disposizion se o vês scrit une conte, un articul, une filastrocje, bessôi o dutun cu la vuestre classe. La direzion e je arlef@regione.fvg.it.

La redazion si riserve di tamesâ i tescj pe publicazion eventûâl.

Ideazion e coordenament di Elisabetta Pozzetto
Piron e Sedon par cure di Federica Angeli
Fumuts di Giovanni di Lena
Pe Filastrocje e Ce isal? a àn colaborât Christian Romanini e Adriano Del Fabro

